

relictum, nulla locum habeat intercapedo. Gradus autem vocamus scalarum similitudine, quia viciniore ad primum Principium, et distantiore loco sunt ordinati. Atque ideo primum etiam rerum ordinem nuncupamus. Ordo enim omnis, ut ab initio diximus, priore constat, et posteriore, tum numero, tum loco. Propterea recte a Pythagora dictum, res esse sicut numeros, quoniam ab unitate viciniore, et longinquiore specie sunt compositi. Atque hæc ni fallimur, occulta hactenus, causa fuit, cur numeri totius plenitudo decenario comprehenditur. Ab uno scilicet descensus est per medios omnes usque ad corpus, omnium infimum. Et cur etiam, ab uno simplicissimo impartibili, in multitudinem semper maiorem, usque ad decadem laberetur, et labendo cresceret. Cresceret autem uno addito; quoniam unum, omnibus sui imaginem, aliud atque aliud unum impartitur, usque quo id quod recipit, ipsius sit capax, usque scilicet ad postremum. Ad quod cum est perventum iterum a summo uno, replicet oportet is, qui ulterius velit numerando progredi. Atque hic descensus, rerum methodus est compositiva per additionem sancta, unius. Ascensus vero methodus alia est principalis, quam resolutivam in sua primogenia vocant, per eiusdem unius facta subtractionem. Ipso uno a multitudine se subtrahente, et in se redeunte. Sed et mirabile aliud in hoc numero, animadversum est antiquitus, quod videlicet denarius, quaternario adimpletur. Simul sibi partibus connumeratis. Inter quas primo est totius universitatis pater, Unum. Cui proxima ab eo veniens, est dualitas, secundam divinitatis personam representans, quæ in patrem versa, tertiam personam per spiritum sibi a patre spiratum, et a se in patrem respiratum producit, ternario representatam, quæ ex uno et duitate simul iunctis procedit. Et quoniam hi tres unum sunt in sua unione, et suo profundo, quaternarium comprehendunt, unum, essentiam, vitam, intellectum. Atque hoc forte voluit Pythagoras, quando tetractym nominabat, et per eam, sacrosancto ac summo omnium iurabat iuramento. Et certe hoc voluit Apostolus, quando dixit:

“Omnia per ipsum, et in ipso creata sunt, et ipse est ante omnes, et omnia in ipso constant, de filio intelligens, Qui est imago Dei invisibilis, primogenitus omnis creaturæ. Quoniam in ipso condita sunt universa, in cœlis, et in terra, visibilia et invisibilia.”

Prius quidem invisibilia quæ diximus, unitates, essentiæ, vitæ, Mentis, quæ omnibus iis comprehenduntur, quæ subnectit.

“Sive throni, sive dominationes, sive principatus, sive potestates.”

Et post has, quæ his, participia fiunt extra profundum, in cœlis, et in terra, visibilia iam facta, sive essentiis, sive viribus, sive actionibus, animæ, naturæ, qualitates, formæ, corpora. Hæc enim omnia illorum participia sunt, a principio facta, et inde venere, et inde pendent. Atque ideo verissime ab eodem dictum Apostolo.

Invisibilia ipsius, a creatura mundi per ea quæ facta sunt, intellecta conspiciuntur. Conspiciuntur quidem illa clarissime, quando intellectus in anima iam a sordibus corporeis purgata, ad illa, quæ corporeis oculis sunt invisibilia, erigitur. Cætero quin, intellectibus materiæ immersis, Epicureis, Aristipæis, Peripateticis, Stoicis et id genus aliis brutis gregibus, tametsi philosophis, stultis semper quæstionibus, quæ lites tantum generant impliciti, sunt invisibilia. Esse autem inter hæc invisibilia, et hæc alia quæ facta sunt visibilia, communionem, et hæc ab illis continua cathena pendere, et ratio philosophica persuadet, natura non saltante, nec vacuum relinquente; et autoritas Apostoli confirmat, dum quæ fide ipse intellexit, scribit in hæc verba:

“Fide intelligimus, aptata esse secula verbo Dei, ut ex invisibilibus, visibilia fierent.”

Verbo Dei, ac filio, unitate illa omnia comprehendente, aptata sunt, et ordine disposita secula, et quæcunque in seculis, hoc est, tum in sempiternitatis ævo, invisibilia, tum in tempore visibilia. Ut scilicet ab illis fierent hæc, et ab eis per participationem, et continuatam communionem, et Sympathiam, hæc penderent, et inde foverentur; et vivificarentur, et in sua quæque specie generarent, et germinarent. Et omnia essent, quasi Iacobi scala, a cœlis ad terram protensa, novem gradibus disposita, per quos, Angeli, et nuncii Dei, descendendo,